




漢書門		九	五	四	六
類	號	函	架	冊	
		二	一	一	二

內閣文庫		漢	書
類	號	冊	函
		九	五
		四	六
		二	一
		一	二

內閣文庫	
番號	漢 9546
冊數	12 (9)
函號	299 249








唐荆川先生纂輯武編後卷三目錄

淺草文庫



示弱

示強

聲此擊彼

利

毒

亂

詭異

避

怒

卑

勞

離

不備

不意

未成列

新集

未集

遠來

饑渴

糧盡

不整

不戒

不

離部

移陣

心怖

半濟

渡

地利

天時

晉熙方拱乾同校
錢塘徐象標刊行

唐荆川先生纂輯武編後卷三

瑯琊焦竑校

示弱

春秋時楚武王侵隨使遠章求成焉軍於瑕以待之
隨人使少師董成鬪伯比言於楚子曰吾不得志於
漢東也我則使然我張吾三軍而被吾甲兵以武臨
之彼則懼而協以謀我故難間也漢東之國隨為大
隨張必棄小國小國離楚之利也少師侈請羸師以
張之王毀軍而納少師少師歸請追楚師隨侯將許
之季梁止之曰天方授楚楚之羸其誘我也君何急

爲君姑修政而親兄弟之國庶免於難隨侯懼而修政楚不敢伐

前漢韓王信反亡走匈奴與匈奴謀攻漢高帝自往擊之至晉陽使人覘匈奴冒頓匿其壯士肥馬牛但見老弱及羸畜使者十輩來皆言匈奴可擊帝使劉敬復往使匈奴還報曰兩國相擊此宜誇矜見所長今臣往徒見羸齒老弱此必欲見短伏奇兵以爭利愚以爲匈奴不可擊也是時漢兵已踰句注三十餘萬衆兵已行帝怒以爲沮吾軍械繫敬廣武遂往至平城匈奴果出奇兵圍高帝白登七日然後得解

晉末妖賊孫恩作亂出海鹽劉裕築城於故海鹽賊日來攻城內兵少裕乃選敢死士擊走之時雖連勝裕深慮衆寡不敵乃一夜偃旗示以羸弱觀其懈乃奮擊大破之

後周末楊堅作相尉遲迥拒命堅遣將于仲文率兵定關東次蓼堤迥將檀讓擁衆數萬人仲文以羸師出戰讓悉衆來拒仲文僞北讓軍頗驕於是遣精兵左右翼擊之大敗讓軍進攻梁郡迥守將劉子寬棄城遁走

後唐伐蜀班師副招討使任圜至利州會延康孝叛

纂輯武編 卷之三
據莫州掌書記張礪獻策於園請伏精兵於後先以
羸師誘之園深以爲然延孝驍將也任園儒生也延
孝覩其羸師殊不介意及戰酣園發精兵擊之遂擒
延孝

五代周世宗伐江南大將張永德請行效命師至壽
春劉仁贍堅壁不下永德出疲兵居前誘之伏精兵
於便地每戰佯不利北退三十里伏兵悉起前後夾
攻大敗之仁贍僅免

宋至道中折御卿授府州節度使而兵不滿數千太
宗戒之曰北虜嘗以西戎爲小蕃必輕敵而深入或
引衆入境爾可先令近下蕃族以羸師誘之伏精兵
以擊之必在吾掌中矣御卿果成克捷

韓魏相攻齊相田忌率兵伐魏魏將龐涓聞之釋韓
而歸齊孫子謂田忌曰彼三晉之兵素皆悍勇而輕
齊齊號爲怯善戰者因其勢而利導之兵法百里趨
利者蹶上將五十里趨利者半至乃使齊軍入魏地
爲十萬竈明日爲五萬竈又明日爲三萬竈龐涓行
三日大喜曰我固知齊卒怯入吾地三日士卒亡者
過半矣乃棄其步兵與其輕銳倍日併行逐之孫子
度其行暮當至馬陵馬陵道狹而旁多阻隘可伏兵

乃斫大樹白而書之曰龐涓死此樹下於是令萬弩夾道而伏期日暮見火舉而俱發龐涓夜至斫樹下見白書乃舉火燭之讀書未畢齊軍萬弩俱發軍大亂龐涓乃自刎

戰國趙將李牧常居代郡鴈門備匈奴以便宜置吏市租皆輸入幕府爲士卒費日擊數牛饗士習騎射謹烽火多設間諜厚遇戰士爲約曰單于爲盜急入堡有敢捕虜者斬匈奴每入烽火謹輒入堡不敢戰如是數歲亦不亡失然匈奴謂牧爲怯趙王讓牧牧如故王怒使人代將歲餘匈奴每來出戰數不利失

亡多復遣牧牧至如故約匈奴數歲無所得終以爲怯邊士日得賞賜皆願一戰於是乃且選兵車得千三百乘騎萬三千匹百金之士五萬人控弓弩者十萬人悉勒習戰大縱畜牧人衆滿野匈奴小入佯走不勝以數千人委之單于聞之大喜率衆而來牧多爲奇陣張左右翼擊之破殺匈奴十餘萬騎單于奔走十餘歲不敢近邊

後漢末孫策攻陳登於匡琦城策初到旌甲覆水羣下咸欲引軍避之登乃閉門自守示弱不戰將士銜枚寂若無人登城觀形勢知其可擊乃申命士衆宿

整兵器昧爽開南門引軍指賊營步騎抄其後策周章方結陣不得還船登縱兵乘之遂大敗

陳霸先討杜龕以侯安都居守齊軍乘虛入據石頭遊騎至關下安都閉門偃旗幟示之以弱且令城中

曰有登陴看賊者斬及夕賊收軍還石頭安都夜令士卒密營禦敵之具明晨賊騎又至安都率甲士三

百人開東西掖門與戰大敗之賊乃退不敢逼

臺城

楚師次于句溼使廬戡黎侵庸及庸方城庸人逐之囚子揚窻三宿而逸曰庸師衆羣蠻聚焉不如復大帥且起王卒合而後進師叔曰不可姑又與之遇以

驕之彼驕我怒而後可克先君蚡冒所以服陘隰也又與之遇七遇皆北惟裨儵魚人逐之庸人曰楚不足與戰矣遂不設備楚子乘驛會師於臨品分爲二隊子越自石溪子具自仞以伐庸秦人巴人從楚師羣蠻從楚子盟遂滅庸

狄青爲將党項犯塞時新募萬勝軍未習戰陣遇寇多北青爲將一日盡取萬勝旗付虎翼軍使之出戰虜望其旗易之全軍徑趨爲虎翼所破始無遺類累功至招討副使青在涇原常以寡當衆度必以奇勝預戒軍中盡捨弓弩皆執短兵密令軍中聞鉦一聲

則止再鉦聲則嚴陣而陽却鉦聲止則大呼而突之
士卒皆如其教纔遇敵未接戰遽聲鉦士卒皆止再
聲皆却虜人大笑相謂曰孰謂天使勇使虜人謂青
爲天使鉦聲止忽前突之虜兵大亂相蹂踐死者不
可勝紀

董搏霄還軍守於潛而賊兵大至焚倚郭廬舍搏霄
按軍不動左右請出兵搏霄曰未也遣人執白旗登
山望賊約曰賊以我爲怯必少懈伺其有間則麾所
執旗又伏兵城外皆授以火礮復約曰見旗動礮卽
發已而旗動礮發兵乃盡出斬首數千級

隋末賊帥孟讓衆十餘萬屯盱眙煬帝遣王世充拒
之世充保都梁山久不與戰乃宣言士卒亡叛使賊
中聞之讓果大笑曰王世充文法吏何能爲將吾當
生縛之於是進攻其柵世充與戰佯不勝讓益輕之
乃分兵虜掠世克知其可擊令軍中夷竈撤幕設方
陣四面出戰大破之虜男女十萬餘口讓僅以身免

示強

春秋楚將子元以車六百乘伐鄭師於桔枳之門入
自純門及達市縣門不發楚言而出子元曰鄭有人
焉諸侯救鄭楚師夜遁鄭人將奔桐丘謀告曰楚暮

有烏乃止

楚大饑戎伐其西南庸人帥羣蠻以叛楚糜人率百濮將以伐楚於是申息之北門不啟楚人謀徙於阪高蔣賈曰不可我能往寇亦能往不如伐庸大麋與百濮爲我饑不能師故伐我也若我出師必懼白濮離居將各走其邑誰暇謀人乃出師旬有五日百濮乃罷自廬以往振廩同食

後漢虞詡爲武都太守以討叛羗羗乃率衆數千遮詡於陳倉嶠谷詡卽停車不進而土書請兵羗聞之乃分鈔旁縣詡因其兵散日夜進道兼行百餘里令

吏士各作兩竈日增倍之羗不逼或問孫臏減竈而君增之兵法日行不過三十里以戒不虞而今日且二百里何也詡曰虜衆多吾兵少徐行則易爲所及速進則彼所不測虜見吾竈日增必謂羣兵來迎衆多行速必憚追我孫子見弱吾今示強勢不同故也到郡兵不滿三千而羗衆萬餘攻圍赤亭數十日詡乃令軍中使強弩勿發而潛發小弩羗以爲矢力弱不能至併兵急攻詡於是使二十強弩共射一人發無不中羗大震退詡因出城奮擊多所殺傷明日悉陳其衆令從東郭門出北郭門入變易衣服迴轉數

周羗不知其數便相恐動詔計賊當退乃潛遣五百餘人於淺水設伏候其走路虜果奔因掩擊大破之

示遠

秦伐韓趙令趙奢將救之去邯鄲三十里而令軍中曰有以軍事諫者死秦軍鼓譟勒兵武安屋瓦盡震軍中候有一人言急救武安奢立斬之堅壁留二十八日不行復益增壘秦間來奢善食遣之間以報秦將秦將大喜曰夫去國三十里而軍不行乃增壘闕與非趙地也趙奢既已遣秦間乃卷甲而趨之一日一夜至令善射者去闕與五十里而軍軍壘成秦人

聞之悉甲而至奢縱兵擊破之遂解闕與之圍

後魏万俟醜奴稱亂關右魏將賀拔若討之軍於汧渭之間宣言遠近曰今氣候漸熱非征討之時待至秋涼更圖進取醜奴聞之遂以爲實分遣諸軍散營農於岐山之北百里細川使太尉侯元進領兵五千據險立柵其千人以下爲柵者亦有數處且田且守岳知其勢分乃密嚴備晡時潛遣輕騎先行斷諸路然後諸軍盡發昧朝攻圍元進柵拔之諸所俘執皆放之自餘柵悉降岳星夜徑趨涇州其刺史侯長貴亦以城降醜奴乃棄平停而走

唐吐蕃都支及遮匄二部叛詔裴行儉爲洮州道總管行儉建議曰吐蕃背叛干戈未息敬玄審禮失律喪元安可更爲西方生事今波斯王身歿其子泥涅帥師充質在京望差使往波斯冊立卽路由二蕃部落便宜從事必可有功高祖從之因命行儉冊送波斯王仍爲安撫大食使行至西州人吏郊迎行儉召其豪傑子弟千餘人隨已而西乃揚言給其下曰天時方熱未可涉遠須涼秋之後方可漸行都支覘知之遂不設備行儉仍召四鎮諸蕃酋長豪傑謂曰憶昔此遊未嘗厭倦雖還京輦無時暫忘今因是行欲

尋舊賞誰能從吾獵也蕃酋子弟請從者僅萬人行儉陽爲略遊獵教試部伍數日遂倍道而進去都支部落十餘里先遣都支所親問其安否外示間暇似非討襲續使人趣召相見都支先與遮匄通謀秋中擬拒漢使卒聞軍到計無所出自率兒姪首領等五百餘騎就營來謁遂擒之是日傳其契箭諸部酋長悉來請命並執送碎葉城簡其精騎輕齎曉夜前進將到遮匄途中果獲都支還使與遮匄使同來行儉釋遮匄使者令先往曉諭其主兼述都支已擒遮匄尋復來降

示近

春秋楚囊瓦伐吳師於豫章吳人見舟於豫章而潛師於巢冬十月吳軍楚師戰於豫章敗之遂圍巢克之獲楚公子繁

後漢耿弇攻張步於劇步遣弟藍將精兵二萬屯西安分諸將萬餘人守臨淄相去四十里弇進軍晝中居二城之間弇視西安城小而堅藍兵又精臨淄名雖大而實易攻乃勅諸校曰後五日攻西安藍聞之晨夜徹守至期夜半弇勅諸將皆蓐食會明至臨淄城荀梁等爭之以爲宜速攻西安弇曰西安聞吾欲

攻之日夜爲備臨淄出不意至必驚擾吾攻之一日必拔臨淄卽下西安孤張藍與步隔絕必復亡去已封所謂擊一而得二者也若攻西安卒不能拔百人屯兵堅城死傷必多縱能拔之張藍引軍還奔臨淄并兵合勢觀人虛實吾深入敵境後絕轉輸敵制吾敝遂攻臨淄半日而拔藍棄西安而遁

岑彭將兵三萬餘人南擊秦豐拔黃郵豐拒彭等於鄧數月不得進彭夜勒兵馬申令軍中使明早西擊山都乃縱所獲虜令得逃亡歸以告豐卽悉其軍西邀彭彭乃潛兵渡沔水擊其軍於河頭山大破之縱

山谷間伐木開道直襲黎丘擊破諸屯兵豐聞大驚
馳歸救之彭依東山爲營豐夜攻彭彭先爲之備出
兵逆擊之豐敗走

後漢將吳漢岑彭討公孫述述使其將延岑等悉兵
拒廣漢及資中又遣將侯丹率二萬餘人拒黃石彭
乃多張疑兵使護軍楊翕與臧宮拒延岑自分兵浮
江下還江州沂都江而上襲擊侯丹大破之因晨夜
倍道兼行二千餘里徑拔武陽使精騎馳廣都去成
都數十里勢若風雨所至皆奔散初述聞漢軍在平
曲故遣大兵逆之及彭至武陽繞出延岑軍後蜀地

震駭

曹公與袁紹相持官渡紹遣將部圖淳于瓊顏良等
攻東郡太守劉延於白馬紹引兵至黎陽將渡河公
北救延荀攸說曰今兵少不敵分其勢乃可公到延
津若將渡兵向其後紹必西應之然後輕兵襲白馬
掩其不備顏良可擒也公從之紹聞兵渡卽分兵西
應公乃引軍兼行趨白馬未至十餘里良大驚來逆
戰使張遼關羽前登擊破斬良遂解白馬之圍
魏初馬超屯潼關曹公大破之諸將或問公曰初賊
守潼關渭北道缺不從河東擊馮翊而反守潼關引

日而後北渡何也公曰賊守潼關若吾入河東賊必引守諸津則西河未可渡也吾故盛兵向潼關賊衆悉南守西河之備虛故徐晃等得間取河西然後引軍北渡賊不能與吾爭河西者以有二將之軍也連車豎柵爲甬道而南旣爲不可勝且以示弱渡渭爲堅壘虜至不出所以驕之也故賊不爲營壘而求割地吾順言許之所以縱逸其意使自安而不爲備蓄士卒之力一朝擊之所謂疾雷不及掩耳兵之變化固非一道也

魏將司馬懿征公孫淵師次于遼水東淵遣卑衍等

步騎數萬阻遼水以拒之圍塹二十餘里懿令其軍穿圍盛兵多張旗幟出其東南賊盡銳赴之乃泛舟潛濟急赴東北斜趨襄平衍等恐襄平無備夜遁蜀諸葛亮領兵出斜谷魏將司馬懿屯北原後數日亮盛兵西行諸將皆謂欲攻西原郭淮獨以爲此見形於西欲使官軍重應之必攻陽遂耳其夜果攻陽遂有備不得上

西魏末岷州羌據州城反魏將獨孤信討之信乃勒兵向萬年頓三交谷口賊并力拒守信因詭道趨稠松嶺賊不虞信兵之至覩風奔潰乘勝逐北徑至城

下賊並出降

唐嗣曹王臯討李希烈之叛成立堡柵於蔡山臯度峻險不可攻乃聲言西取蘄州理戰艦步兵傍南涯與舟師泝江而上賊以老弱守柵引軍循江隨戰艦南北與臯兵相去直蔡山三百餘里臯令步兵登舟順流東下不日拔蔡山賊還救間一日方至大破之因進拔蘄州降其將

聲此擊彼

前漢景帝時七國反周亞夫爲將吳楚兵乏糧饑欲退數挑戰終不出夜軍中驚內相攻擊擾亂至於帳

下亞夫堅臥不起頃之復定吳奔壁東南陬亞夫使備西北已而精兵果奔西北不得入乃大敗之

後漢末黃巾賊起漢將朱雋率兵討之賊帥韓忠據宛拒雋雋兵少不敵乃長圍結壘起土山以臨城內鳴鼓攻其西南賊悉衆赴之雋自將精兵五千掩其東北乘城而入忠乃退保小城惶恐乞降

西魏末涼州刺史宇文仲和據州不受代魏將獨孤信率兵討之仲和嬰城固守信夜令諸將以衝梯攻東北信親帥壯士襲其西南遲明克之

魏田豫到馬城鮮卑攻圍之十重豫密使司馬建旌

旗鳴鼓吹將步兵從南門出胡人皆屬目往赴之豫將精銳自北門出鼓譟而起兩頭俱發出虜不意虜衆散亂皆無弓馬步走追三十餘里僵屍積地

宋劉道濟爲益州刺史州政失中羣盜蜂起攻圍州城道濟將裴方明出東門破賊三營斬首數萬級賊雖敗已復還合方明復僞出北門迴擊城東大營殺千餘人時天大霧方明等復揚聲出東門而潛自北門出攻城北城西諸營賊衆大潰於是奔散

越伐吳吳子禦之笠澤夾水而陣越子爲左右句卒使夜或左或右鼓譟而進吳師分以禦之越以三軍

潛涉當吳中軍而鼓之吳師大亂遂敗之

漢王遣將韓信擊魏魏盛兵蒲坂塞臨晉信乃益爲疑兵陳船欲渡臨晉而伏兵從夏陽以木罌甕渡軍襲安邑虜魏王豹

郭淮討叛羗其羗遮塞等屯河關白土故城據河拒官軍淮見兵上流密於下流渡兵據白土故城擊大破之

前燕將慕容垂討丁零翟釗于滑臺次于黎陽津釗於南岸拒守垂徙營就西津爲牛皮船百餘艘載疑兵列艘泝流而上釗先以大衆備黎陽見垂向西津

乃棄營西拒垂潛遣兵向黎陽津夜濟壁于河南釗
聞而奔還士衆疲竭走歸滑臺釗攜妻子率數百騎
走垂遣追擊之盡擒其衆

狄青征儂智高時智高還守邕州青懼崑崙關險阨
爲所據乃按兵不動下令賓州具五日糧休士卒值
上元節令張大燈燭首夜宴將佐次夜宴從軍官三
夜響軍校首夜樂飲徹曉次夜二鼓時青忽稱病暫
起如內久之使人諭孫沔令暫主席行酒少服藥乃
出數使勸勞座客至曉客未敢退忽有馳報者云是
夜三鼓青已奪崑崙矣賊諜知不爲備是夜大風雨

青率兵半夜時度崑崙關旣度喜曰賊不知守此無
能爲也彼爲夜半風雨吾不敢來吾來所以出其不
意也已近邕州賊方覺逆戰於歸仁舖青登高望之
賊據坡上我軍薄之青使步卒居前匿騎兵于後巒
使驍勇者執長槍居前羸弱悉在其後其前鋒孫節
戰不利而死將卒畏青令嚴力戰莫敢退者青登高
丘執五色旗麾騎兵爲左右翼出槍之後斷蠻軍爲
三旋而擊之人人皆殊死戰先是青已縱蕃部馬二
千出賊後交擊左者右右者左已而右者復左左者
復右賊不知所爲賊之標牌軍爲馬軍所衝突皆不

能駐槍立加束軍士又縱馬上鐵連枷擊之遂加披靡相枕藉死賊遂大敗智高果焚城遁去智高自起至平幾一年吏民不勝其毒先是謠言農家種余家收而高爲青所破皆如其謠

隋漢王諒作亂遣其將余公理自太行下河內隨將史祥討之軍於河陰久不得濟謂軍吏曰余公理輕而無謀才用素不足稱又新得志謂其衆可恃恃衆必驕且河北人先不習兵所謂擁市人而戰不足圖也乃令軍中脩攻具攻河陽公理使諜知之果屯兵於河陽內城以拒祥祥於是艤船河南公理聚甲以

當之祥乃簡精銳於下流潛渡公理率衆拒之祥至瀆水兩軍相對公理未成列祥縱擊大破之

利

春秋時楚伐絞軍其南門莫敖屈瑕曰絞小而輕輕則寡謀請無扞採樵者以誘之從之絞人獲三十人明日絞人爭出驅楚役徒於山中楚人坐其北門而覆諸山下大敗之爲城下之盟而還

陳豨反趙代皆豨有高祖聞豨將皆故賈人上曰吾知與之矣乃多以金賂豨將豨將多降

後漢光武初馮異與鄧禹率車騎將軍鄧弘等議攻

赤眉異曰賊餘衆尚多可稍以恩信傾難卒以用兵破之也上今使諸將屯澠池邀其東而異擊其西一舉取之此萬成計也禹弘不從遂大戰赤眉佯敗棄輜重走車皆載土以豆覆其上兵士饑爭取之赤眉引還擊弘弘軍潰亂大爲所敗

魏曹公西征馬超與超夾潼關而軍公急持之而潛遣徐晃等夜渡蒲坂津據河西爲營公自潼關北渡未濟超赴船急戰公放牛馬以餌賊賊亂取牛馬公乃得渡循河爲甬道而南賊退距渭口公乃多設疑兵潛以舟載兵入渭爲浮橋夜分兵結營於渭南賊

夜攻營伏兵擊破之

曹操與袁紹相持官渡旣乃循河而西紹於是渡河追公軍至延津南公勒兵駐營南坂下使登壘視之曰可五六騎有頃復白騎稍多步兵不可勝數公曰勿復白乃令騎解鞍放馬是時輜重就道諸將以爲敵騎衆不如還保營公曰此所以餌敵也如何去之紹騎將文醜與劉備將兵五千騎前後至諸將復白可上馬公曰未也有頃騎至稍多或分趨輜重公曰可矣乃皆上馬時騎不滿六百遂縱兵擊大破之晉將劉牢之討妖賊孫恩恩敗走虜男女二十餘萬

一時入海懼官軍躡其後乃緣道多棄寶物子女時東土殷實莫不粲麗盈日牢之等遽於收斂故恩得逃去

晉李矩守滎陽後趙石勒親率兵襲矩矩遣老弱入山令所在放牛馬因設伏以待之賊爭取牛馬伏發齊呼聲動山谷遂大破之斬獲甚衆勒乃退

南涼禿髮儁檀守姑臧秦姚興遣將姚弼等至於城下儁檀驅牛羊於野弼衆抄掠儁檀因分擊大_破

後魏末大將廣陽王元深伐北狄使于謹單騎入賊中示以恩信於是西部鐵勒酋長也列河等五萬餘

戶並款附相率南遷廣陽欲與謹至折敦嶺迎接之謹曰陸汗拔陵兵衆不少聞也列河等歸附必來要擊彼若先據險要則難與爭鋒今以列河等餌之當競來抄掠然後設伏而待必指掌破之廣陽然其計拔陵果來擊破也列河於嶺上部衆皆沒謹伏兵發賊遂大敗悉收也列河之衆

隋煬帝征高麗于仲文率軍從樂浪道軍次烏骨城仲文簡羸馬驢數千置於軍後旣而率衆東過高麗出兵掩襲輜重仲文迴擊大破之

唐薛萬均爲幽州羅藝將會竇建德率衆十萬來寇

集賢堂正統 卷之三 十一
范陽萬均曰衆寡不敵今若出門百戰百敗當以計
取之可令羸兵弱馬背城爲陣以誘之觀賊之勢必
渡水交兵萬均請精騎伏於城側待其半渡擊之從
其言建德果引兵渡水因邀擊大破之

漢傳介子以駿馬監求使大宛因詔令責樓蘭龜茲
國介子至樓蘭責其王教匈奴遮殺漢使大兵方至
王苟不教匈奴使過至諸國何爲不言王謝服
言匈奴使屬過當至烏孫道過龜茲介子復責其王
王亦服罪介子從大宛還到龜茲龜茲言匈奴使從
烏孫還在此介子因率其吏士共誅斬匈奴使者還

奏事詔拜介子爲中郎遷平樂監介子謂大將軍霍
光曰樓蘭龜茲數反覆而不誅無所懲艾介子過龜
茲時其王近就人易得也願往刺之以示威諸國大
將軍曰龜茲道遠且驗之於樓蘭於是白遣之介子
與士卒俱齎金幣揚言以賜外國爲名至樓蘭樓蘭
王意不親介子介子陽引去至其西界使譯謂曰漢
使者持黃金錦繡行賜諸國王不來受我去之西國
矣卽出金幣以示譯譯還謂王王貪漢物來見漢使
者介子與坐飲陳物示之飲酒皆醉介子謂王曰天
子使我私報王王起隨介子入帳中屏語壯士二人

從後刺之刃交胷立死其貴人左右皆散走介子告
諭以王負漢罪天子遣我來誅王當更立太子質在
漢者漢兵方至毋動動滅國矣遂持王首還詣闕
裴矩爲黃門侍郎 以始畢可汗強盛漸生怒隙
言於帝曰突厥本淳易可離間但由其內多有羣胡
盡皆桀黠教導之耳臣聞史蜀胡悉兀多奸計幸於
始畢請誘殺之帝曰善矩因遣人告胡悉曰天子出
珍物今在馬邑欲共蕃酋多作交關若前來者卽得
好物胡悉貪而信之不告始畢率其部盡驅六畜星
馳爭進冀先互市矩伏兵馬邑下誘而斬之詔報始

畢曰史蜀胡悉忽領部落走來至此云背可汗請我
容納突厥旣是我臣彼有背叛我當共殺今已斬之
故令往報

南涼禿髮傉檀伐沮渠蒙遜於姑臧至蕃禾苜蓿掠
五千餘戶其將屈古進曰陛下轉戰千里前無完陳
徙戶資財盈溢衢路宜倍道旋師早渡峻險蒙遜善
於用兵士衆習戰若輕軍卒至出吾慮表大敵外逼
徙戶內攻危道也衛尉伊方延曰我軍勢方盛將士
勇爭自倍彼徒我騎勢不相及若倍道旋師必捐棄
資財示人以弱非計也俄而昏霧風雨蒙遜軍大至

隋檀大敗而還

唐武德中李靖隨河間王孝恭討蕭銑於江陵銑悉見兵出拒戰孝恭將擊之李靖止之曰彼救敗之師策非素立勢不能久不若且泊南岸緩之一日彼必分其兵或留拒我或歸自守兵分勢弱我乘其懈而擊之蔑不勝矣今若急之彼則併力死戰楚兵剽銳未易當也孝恭不從留靖守營自帥銳師出戰果敗走趨南岸銑衆委舟收掠軍資人皆負重靖見其衆亂縱兵奮擊大破之乘勝直抵江陵入其外郭又攻水城拔之大獲舟艦李靖使孝恭盡散之江中諸將

皆曰破敵所獲當藉其用柰何棄以資敵靖曰蕭銑之地南出嶺表東距洞庭吾懸軍深入若攻城未拔援兵四集吾表裏受敵進退不獲雖有舟楫將安用之今棄舟艦使塞江而下援兵見之必謂江陵已破未敢輕進往來覘伺動淹旬月吾取之必矣銑援兵見舟艦果疑不進銑降

毒

晉師伐秦秦人毒涇上流師人多死飲毒水故

後魏時庫莫奚亂詔濟陽王率衆討之乃爲毒酒賊既逼棄營而走賊至競飲毒作王以輕騎縱擊俘獲

殆盡

亂

吳伐越越子勾踐禦之陳於攜李勾踐患吳之整也使死士再擒焉不動使罪人三行屬劍於頸而辭曰二君有治臣奸旗鼓不敏於君之行前不敢逃行敢歸死遂自刎師屬之目越子因而伐之大敗之

春秋時吳伐楚吳公子光喪其乘舟餘皇光請於其衆曰喪先王之乘舟豈惟光之罪衆有焉請藉取之以救死衆許之使長鬣者三人潛伏于舟側曰我呼餘皇則對師夜從之三呼皆對楚人從而殺之楚師

亂吳人大敗之取餘皇以歸

五代梁太祖屯軍于岐下晉軍潛襲絳州前軍不利晉軍恃勢而攻臨汾氏叔宗嚴備禦乃於軍中選壯士二人深目虬鬚貌如沙陀者令就襄陽縣牧馬於道側蕃寇見之不疑二人因雜其行間俄而伺隙各擒一虜而來晉軍大驚且疑有伏兵遂退據滿城後漢初馮異將數萬人與賊約期會戰使壯士變服與赤眉同伏於道側明日赤眉使萬人攻異前部異纔出兵以救之纔少出兵所以示弱賊見勢弱遂悉衆攻異異乃縱兵大戰日昃賊氣衰伏兵猝起衣服

相亂赤眉不復識別衆遂大潰追擊大破於峭底
岳飛遇兀朮趨建康飛設伏牛頭山待之夜令百人
黑衣混金營中擾之金兵驚自相攻擊兀朮次龍灣
飛以騎三百步兵二千馳至新城大破之兀朮奔淮
西遂復建康飛奏建康爲要害之地宜選兵固守仍
益兵守淮拱護腹心帝嘉納之

詭異

春秋時齊師宋師次於郎魯侯禦之公子偃曰宋師
不整可敗也宋敗齊必還請擊之公弗許自雩門竊
出蒙臯比而先犯之公從之大敗宋師于乘丘齊師

乃還

晉楚相持城濮之戰晉師陳于莘北胥臣以下軍之
佐當陳蔡楚子玉以若敖之六卒將中軍曰今日必
無晉矣子西將左子上將右胥臣蒙馬以虎皮先犯
陳蔡陳蔡奔楚右師潰狐毛設二旆而退之欒枝使
輿曳柴而僞遁楚師馳之原軫卻溱以中軍公族橫
擊之狐毛狐偃以上軍夾攻子西楚左師潰楚師敗
績

朱滔帥幽州成德軍李寶臣死其子惟岳謀襲父位
滔與張孝忠征之大破惟岳於東鹿進圍深州惟岳

統萬餘衆及田悅援兵至東鹿惟岳將王武俊以騎
三千方陣橫進滔繪帛爲狻猊象使猛士百人蒙之
鼓譟奮馳賊馬驚亂隨擊大破之惟岳焚營而遁
春秋時楚師伐吳鍼尹固與王同舟使王執燧象以
奔吳師

戰國燕師伐齊已下七十餘城圍卽墨未下齊將田
單乃收城中得千餘牛爲絳繒衣畫以五彩龍文束
兵刃於其角而灌脂束葦於尾燒其端鑿城數十穴
夜縱火牛壯士五千人隨其後牛尾熱怒而奔燕軍
大驚牛尾炬火光明炫耀燕軍視之皆龍文所觸盡

死傷五千人因銜枚擊之而城中鼓躁從之老弱皆

擊銅器聲動天地燕軍大駭敗走而收齊七十

餘城

殷浩北伐請江道爲諮議參軍姚襄結營以逼浩浩
令道擊之道進軍至襄營謂將校曰今兵非不精而
衆少於羗且壁柵固難與較力吾當以計破之乃取
雞數百以長繩連之繫火於足羣雞駭散飛集襄營
火發因其亂隨而擊之襄遂敗

避

春秋時楚伐隨軍於淮漢之間隨將季梁曰楚人尚
左君必左無與王遇且攻其右右無良焉必敗偏敗

衆乃攜矣少師曰不當王非敵也弗聽戰于速祀隨師敗績

後漢末袁尚據鄴率兵圍擊兄譚於南皮留蘇由審配守鄴曹操圍鄴尚還救諸將皆以爲此歸師人自爲戰不如避之操曰尚從大道來當避之若循西山來者此成禽耳尚果循西山來臨滏水爲營夜遣兵犯圍操逆擊破走之城中崩潰

晉劉裕征慕容超盧循乘虛入寇建業裕急還救時議者欲分兵屯守諸津裕曰賊衆我寡分其兵則人測虛實一處失利則阻三軍之心若聚衆石頭則衆

力不分裕移鎮石城賊大至裕曰賊若新亭直上且將避之若回泊蔡洲成禽耳徐道覆欲自新亭焚舟而戰盧循多疑少決每求萬全乃泊蔡洲以待晉軍
裕登石頭以望循軍初見引向新亭宋武顧左右失色旣而迴汨蔡洲道覆猶日日欲上循禁之使羸老悉乘舟艦向白石裕慮其從白石西上乃率劉毅等北出拒之賊遂率衆數萬屯丹陽郡裕率諸軍馳歸衆慮賊過江咸謂當徑還拒戰裕乃先引軍還石頭衆莫之曉是日大熱三軍疲頓旣上城解甲息士洗浴飲食久之乃出列陣於南塘叅軍褚叔度朱齡

石率勁勇千餘人過淮賊數千皆長刀矛鋌刃甲耀日奮躍爭進齡石所領多鮮卑善步稍並結陣以待之賊短兵弗能抗死傷者數百人乃退走

大軍次大雷滅方江而下裕躬提幡鼓命衆軍齊力擊之軍中多萬鈞神弩所至莫不摧陷裕自於中流蹙之因風水之勢賊艦悉薄西岸岸上軍先備火具焚之大敗循還潯陽遂走豫章

怒

楚漢相持彭越數絕楚糧道項羽欲討越謂其將曹咎曰謹守成臯漢欲挑戰謹勿與戰無令得東我十

五日必誅彭越定梁地漢果數挑戰楚軍不出使人辱之五六月曹咎怒渡兵汜水漢擊之大破楚軍盡得楚貨賄曹咎自到汜水上

前秦符氏遣將符黃眉鄧羗等率步騎討姚襄襄深溝高壘固守不戰鄧羗說黃眉曰傷弓之鳥落於虛發襄頗爲晉將桓温所敗銳氣衰矣今固壘不戰是窮寇也襄性剛狼易以剛動若長驅鼓行直壓其壘襄必忿而出師可一戰而擒也黃眉從之遣羗率騎三千軍於襄壘以挑之襄果怒盡銳出戰羗僞不勝引騎而退襄追之至于三原羗回騎拒襄俄而黃眉

至大戰斬之盡俘其衆

隋杜伏威聚徒數萬煬帝遣將軍陳稜以兵八千討之稜不敢戰伏威遺稜婦人之服以激怒之并致書號爲陳姥稜大怒悉衆而來伏威逆拒自出陣前挑戰稜部將射中其額伏威怒指之曰不殺汝我終不拔箭遂馳之稜俯伏走奔其陣伏威因入稜陣大呼衝之所向披靡復獲所射者使其拔箭然後斬之攜其首復入稜軍大敗僅以身免

單

漢匈奴單于冒頓初立東胡方強遣使謂冒頓欲得

千里馬冒頓以問羣臣皆曰千里馬國之寶勿與冒頓曰柰何與人隣國愛一馬乎遂與之東胡又遣使來曰願得單于一闕氏冒頓問羣臣皆怒曰東胡無道乃求闕氏冒頓曰與人隣國愛一女子乎與之居頃之東胡復曰匈奴有棄地千餘里吾欲有之冒頓問羣臣或曰與之冒頓大怒曰地者國之本也柰何與之諸言與之者皆斬之冒頓上馬令國中有後至者斬遂往襲之東胡輕冒頓不爲之備冒頓滅之蜀將關羽北伐擒魏將于禁圍曹仁于樊吳將呂蒙在陸口稱疾詣建業陸遜往見之謂曰關羽接境如

何遠下後不堪憂也蒙曰誠如來言然我病篤遜曰羽矜其驕氣凌轢於人禁等爲水所沒非戰守之所失羽始有大功意驕志逸又相聞疾必益無備今出其不意自可擒制下見至尊宜好爲計蒙曰羽素勇猛旣難爲敵且已據荊州恩信大布兼始有功膽氣益壯未易圖也蒙至都權問卿病誰可代者蒙對曰陸遜慮思深長才堪負重觀其規慮終可大任而未

大克一何巍巍敵國敗績利在同盟聞慶撫節相遂席卷可獎王綱某不敏受任來西延慕光塵思稟良規又曰于禁等見獲遐邇欣嘆以爲將軍之勲足以長世雖昔晉文城濮之師淮陰拔趙之略蔑以尚之聞徐晃等步騎駐旌窺望麾葆操猾虜也忿不思難潛增衆以逞其心雖云師老猶有驍悍且戰捷之後常苦輕敵古稱軍勝彌警願將軍廣爲方計以全獨克僕書生疎遲忝所不堪嘉隣威德樂自傾盡雖未合策猶可懷也羽覽書有謙下自託之意遂大安無復所嫌遜具啓狀陳其可擒之要權乃潛軍而上使

遜呂蒙爲前部至卽克公安南郡

東晉初石勒僞推奉晉幽州刺史王浚浚不疑勒於是輕騎襲幽州以火宵行至易水浚督護馳遣白浚引軍拒勒浚將佐咸請出擊勒浚怒曰石公來正欲奉戴我也敢言擊者斬乃命設饗以待之勒晨至薊叱門者開門疑有伏兵先驅牛羊千頭聲言上禮實欲填諸街巷使兵不得發浚乃懼或坐或起勒入城升其廳事命甲士執浚立之於前數其罪惡而誅之遂取幽州

勞

春秋楚申公巫臣爲令尹子重子反所逐出奔晉巫臣自晉遺二子書曰爾讒慝事君而多殺不辜余必使爾疲於奔命以死巫臣請使於吳景公許之吳王壽夢說之乃通吳于晉以兩之一卒適吳舍偏兩之一焉與其射御教吳乘車教之戰陳教之叛楚寘其子狐庸爲行人於吳吳始伐楚伐巢伐徐遂入州來子重子反於是乎一歲七奔命蠻夷屬於楚者吳盡取之

吳子闔廬問於伍員曰伐楚如何對曰楚執政衆而乖莫適任患若爲三師以肄焉一師至彼必皆出彼

出則歸彼歸則出楚必道敝亟肄以罷之多方以誤之既罷而後以三軍繼之必大克之闔廬從之楚於是乎始病吳遂入郢

隋高頴獻取陳之策曰江北地寒田收差晚江南土熱水田早熟量彼收穫之際頴集士馬聲言掩襲必屯兵禦守足得廢其農時彼既聚兵我便解甲再三若此賊以爲常後雖集兵彼必不信猶豫之頃我乃濟師登陸而戰兵氣益倍文帝行其策陳人益懼後周遣將討高齊師圍洛陽齊將段韶禦之韶登卽坂聊欲觀周軍形勢至大和谷便值周軍卽遣馳告

諸營與將結陣以待之周軍仍以步人在前上山逆戰韶以彼徒我騎且却且引待其力敝乃遣下馬擊之短兵始交周人大潰洛城之圍並卽奔遁

後周遣將率突厥之衆逼齊晉陽齊將段韶禦之時大雪之後周人以步卒爲前鋒從西山下去城二里諸將咸欲逆擊之韶曰步人氣力有限今積雪凝厚逆戰非便不如陣以待之彼勞我逸破之必矣旣而交戰大敗之敵前鋒盡殪無復孑遺自餘通宵奔遁

唐太宗戰竇建德於汜水東建德列陣彌亘數里太宗將數騎登高而觀之謂諸將曰賊渡險而囂是軍

無政令逼城而陣有輕我心陣久卒饑必將自退退而擊之何往不克建德列陣自卯至午兵士饑倦皆列坐又爭飲水太宗曰可擊之矣遂戰大破之生擒建德

朱熹曰古之戰也兩軍相對甚有禮有饋惠焉有飲酌焉不似後世便只是濫殺將去劉錡順冒之捷亦只是投之死地而後生當時虜騎大擁而至凡十餘萬諸將會議以爲固知力不能當然急渡江則朝廷兵守已自戒嚴必不可渡兼攜持老幼虜騎已迫必爲所追其勢終歸於死若兩下皆死不若固守庶幾

可生遂開城門而守虜人大至劉錡先遣人約他某日戰虜人謂其敢與我約戰大怒至日虜騎壓於城外時正暑月劉錡分部下兵五千爲五隊先備暑藥飯食酒肉待用先以一副兜鍪與甲置之日下曠時令人以手摸看熱得幾何如此數次其兜鍪與甲尚可容手則未發直待熱如火不可容手乃喚一隊軍至令吃酒飯少定與暑藥遂各授兵出西門戰少頃又喚一隊至授之出南門如此數隊分諸門迭出迭入虜遂大敗緣虜人衆多其立無縫僅能操戈更轉動不得而我兵執斧入人叢掀其馬甲以斷其足一

騎纔到卽壓數騎殺死甚衆況當虜衆正熱甲盾如火流汗喘息煩悶而吾軍迭出飽銳清涼而傷困者卽扶歸就藥調護遂以至寡敵至衆虜人大敗方有怯中國之意遂從和議前此皆未肯真箇要和此是庚申年六月可惜此機不遂

離

漢先零罕开二種羌解仇合黨爲寇漢將趙充國討之上書曰先零羌虜欲爲背叛故與罕开解仇然私心恐漢兵至而罕开背之常欲赴罕开之急以堅其約若先擊罕羌先零必助之今虜馬肥糧食方饒擊


之恐不能傷害適使先零得施德於罕羌堅其約合其黨虜交堅黨合誅之用力數倍臣恐國家憂累繇十數年不二三歲而已先誅先零則罕开之屬不煩兵服矣宣帝從之果如其策

後漢末曹操征關中進軍渡渭馬超及韓遂數請戰不許因請割地求送任子賈詡以爲可僞許之操復問計詡曰離之而已操曰解韓遂請與操相見操與遂交馬語移時不及軍事但說京師故舊拊手勸笑旣罷超等問遂公何言遂曰無所言也超等疑之他日操又與遂書多所點抹如遂改定者超等愈疑遂

自是超遂構隙公乃克日會戰先以輕兵挑之戰良久乃縱驍騎夾擊大破之遂超等走涼州
 蔣濟為曹操丞相主簿初蜀將關羽圍樊城既降于禁斬龐德威震華夏曹操議徙許都以避其銳司馬懿及濟以為關羽得志孫權必不願也可遣人勸權躡其後許割江南以封權則樊圍自解太祖如其言權聞之即引兵據江陵羽遂見擒

東晉平州刺史崔恣陰結高句麗及宇文段國等同滅慕容廆以分其地廆聞之曰彼信崔恣虛說邀一時之利烏合而來耳既無統一莫相歸服吾今破之

必矣然彼軍初合其鋒甚銳幸我速戰若逆擊之落其計矣不若靜以待之必懷疑貳迭相猜防一則疑吾與恣譎而覆之二則自疑三國之中與吾有韓魏之謀者待其人情沮惑然後取之於是三國攻廆廆閉門不戰遣使送牛酒以犒宇文大言於眾曰崔恣昨有使至於是二國果疑宇文同於廆也引兵而歸宇文悉獨官曰二國雖歸吾當獨兼其國盡眾逼城連營三十里廆簡精銳士配子骹摧鋒於前子翰領精騎為奇兵從旁出直衝其營廆方陣而進悉獨官自恃其眾不設備見廆軍之至方率兵拒之前鋒始



交翰已入其營縱火焚之衆大敗

不備

後漢末廬江太守劉勲理皖城恃兵強士勇橫於江淮之間無出其右者孫策惡之時已有江左自領會稽太守使人卑辭厚幣而說之曰海昏上繚宗人數欺下國患之有年矣擊之路由不便幸因將軍神武而臨之且上繚國富廩實吳娃越姬充於後庭明珠火具被於帑藏取之可以資軍雖蜀郡成都金碧之府未能過策願舉敝邑躬率士卒以爲外援勲允之劉曄諫曰上繚雖小而城堅池深守之則易攻之則

難不可旬日而拔也且兵見疲於外而國虛於內孫策多謀而善用兵乘虛襲我將何禦之而將軍進屈於敵退無所歸羝羊觸藩其在茲乎勲不從遂大興師伐上繚策果襲廬江破之勲窮蹙遂奔曹公

蜀將關羽遣糜芳守南郡羽領兵圍樊城吳主遣將呂蒙屯陸口厚與關羽結好羽多留兵備南郡恐蒙有變蒙上疏曰羽討樊而多留兵必恐蒙圖其後故也蒙常有病乞分衆還建業以理病爲名羽聞之必撤備徐以大軍泝江馳上襲其空虛則南郡可下而羽易擒矣吳主然之蒙遂稱病而還建業羽稍撤備

而悉衆赴樊城蒙遂發兵逆流而上伏甲於舟使更衣爲商人以理征棹達旦兼行過羽所置屯戍輒縛之羽遂失驚師次于南郡襲奪其城羽吏士攻樊城未下聞城已陷而家屬無恙見待甚於平時無復鬪心稍稍分散羽竟爲吳師所擒荊州遂平朱序鎮襄陽符堅遣符丕石越攻之次沔北序以秦無舟楫不以爲虞石越遂遊馬以渡序大懼守中城越攻陷外郭獲船百餘艘以濟軍後屢戰秦兵引退序不設備督護李伯護密送款於秦爲內應遂尤襄陽執序送長安

後燕慕容盛據遼東遼西太守李殷陰引後魏軍上表請發兵以拒寇盛曰此必詐也召其使而詰之果驗盡滅其族遣將李旱率騎討之師次建安召旱旋師殷聞其家被誅也擁二千餘戶以自固及聞旱中路而還謂有內變不復爲備留其子養守令支迎魏師于北平旱候知之襲克令支遣裨將追殷及于無終斬之盛謂羣臣曰前以追旱還者殷新爲叛逆必忌官威一則鳩合同類劫害良善二則亡竄山澤未可卒平故非意而還以盈怠其志卒然掩之必克之理也羣臣皆曰非所及也

後魏陵州木籠獠恃險每行抄劫大將陸騰討之獠
因山爲城攻之不可拔騰於城下多設聲樂及雜伎
示無戰心諸獠果棄其兵仗攜妻子臨城觀樂騰知
其無備密令衆軍俱上諸賊惶懼不知所爲遂縱兵
討擊盡破之

隋將賀若弼鎮淮南請沿江防人每交代之際必集
歷陽於是大列旗幟營幕被野陳人以為大兵至悉
發國中士馬既知防人交代其衆復散後以為常不
復設備其後弼以大軍濟江陳人弗之覺遂滅陳
春秋楚子重自陳伐莒圍渠丘渠丘城惡衆潰奔莒

楚入渠丘莒人囚楚公子平楚人曰勿殺吾歸而俘
莒人殺之楚師圍莒莒城亦惡庚申莒潰楚遂入鄆
莒無備故也君子曰恃陋而不備罪之大者也備禦
不虞善之大者也莒恃其陋而不修城郭浹辰之間
而楚克其三都無備也夫

漢末曹操征烏桓諸將士多懼郭嘉曰胡恃其遠必
不設備因其無備卒然擊之可破滅也操行至易水
嘉又曰兵貴神速今千里襲人輜重多難以趨利不
如輕兵以出掩其不意乃密出盧龍塞外道絕不通
乃塹山堙谷五百餘里涉鮮卑庭東指柳城未至二

百里虜乃知之將數萬騎逆軍登白狼山卒與虜遇
衆甚盛操登高觀虜陣不整縱兵擊之使張遼爲先
鋒虜大敗也

曹操擊袁譚袁尚於黎陽使李典與程昱等以船運
糧會尚遣高藩將兵屯河上絕水道典與諸將議曰
藩軍少甲而恃水有懈怠之心擊之必克昱亦以爲
然遂北渡河攻藩破之水道得通

唐李靖陳圖蕭銑十策有詔拜行軍總管軍政一委
焉靖閱兵夔州銑以時屬秋潦江水汎漲三峽路危
必謂靖不能進遂休兵不設備靖率師而進曰兵貴

神速機不可失今兵始集銑尚未知乘水漲之勢倏
忽至城下所謂疾雷不及掩耳縱使知我倉卒無以
應敵此必成禽也進兵至夷陵銑始懼召兵江南果
不能至勒兵圍城銑遂降

不意

春秋楚大夫子囊師于棠以伐吳吳不出而還子囊
殿以吳爲不能而弗做吳人自臯舟之隘要而擊之
楚人不能救吳人敗之

隋末李密攻宇文化及還其勁兵良馬多死隋將王
世充守東都欲乘敝擊之簡練精銳得二萬餘人馬

二千餘匹至偃師營於通濟渠南是時密新得志於化及有輕世充之心不設壁壘世充夜遣二百餘騎潛入北山伏谿谷中命軍士秣馬蓐食既而宵濟人奔馬馳遲明而薄密密出兵應之陳未成列而兩軍合戰其伏兵蔽出而上潛登北原乘高而下馳壓之密營遂亂無能拒之者卽入縱火軍大驚潰

晉王渾領豫州刺史與吳接境宣布威信前後降附甚多吳將薛瑩魯淑衆號十萬淑向弋陽瑩向新息時州兵並放休息渾統一旅浮淮潛濟出其不意瑩等不虞晉師之至渾擊破之

唐光啓中秦宗權數爲朱全忠所敗恥之悉力以攻汴州其將張晁屯於北郊秦賢屯於板橋各有衆數萬列三十六寨連延二十餘里全忠謂諸將曰賊蓄銳休兵方來擊我謂吾兵少畏懼止於堅守而已今出其不意先擊之乃親引兵攻秦賢砦將士踴躍爭先賊果不備連拔四砦斬首萬餘級賊衆以爲神梁兵攻潞州築夾寨會晉王李克用死太祖以爲援兵不能復來不復設備晉王存勗與諸將謀曰朱溫所憚者先王耳聞吾新立以爲童子未閑軍旅必有驕怠之心若簡精兵倍道趨之出其不意破之必矣

取威定霸在此一舉不可失也乃大閱士卒發潯陽
軍于黃碾伏兵三垂岡詰旦大霧進兵直抵夾寨梁
軍無斥堠不意晉兵之至將士尚未起軍中驚擾晉
兵燒寨鼓譟而入梁兵大潰死亡將校士卒以萬計
魏五光末賊元伯生西自崎潼東至鞏洛屠陷塢壁
所在爲患孝武遣京畿都督婁昭討之昭請以五千
人行段永曰此賊無城柵惟以寇鈔爲資取之在速
不在衆也若星馳電發出其不虞精騎三百足矣帝
然其計於是命永代昭以五百騎倍道兼進遂平
東魏北豫州刺史高仲密叛降魏宇文泰以仲密所

據遼遠難爲應接諸將皆憚此行李遠獨曰北豫遠
在賊境高歡又屯兵河上以常理而論實難救援但
不入獸穴不得獸子若奇兵出其不意事或可濟脫
有利鈍固是兵家之常如其固堅行便無克定之日
泰大喜曰李遠所言差強人意乃授行堂尚書前驅
東出泰率大軍繼進遠乃潛師而往拔仲密以歸
唐契必何力從征吐谷渾時吐谷渾主在突倫川何
力復欲襲之薛萬均懲其前敗固言不可何力曰賊
非有城郭逐水草以爲生若不襲其不虞便恐鳥驚
魚散一失機會安可傾其巢穴耶乃自選驍兵千餘

騎直入突倫川襲破吐谷渾牙帳斬首數千級獲駝馬牛羊二十餘萬頭吐谷渾主脫身而免

魏末遣將鍾會鄧艾伐蜀蜀將姜維守劍閣鍾會攻維未能克艾上言請從陰平由斜徑出劍閣西入成都奇兵衝其腹心劍閣之軍必還赴涪則會方軌而進劍閣之軍不還則應涪之兵寡矣軍志云攻其不備出其不意今掩其空虛破之必矣冬十月艾自陰平行無入之地七百餘里鑿山通道遣作橋閣山高谷深至爲艱險糧運將匱瀕於危殆艾以氊自裹推轉而下將士皆攀木緣崖魚貫而進先登至江油蜀

守將馬邈降諸葛瞻自涪還綿竹列陣相拒大敗之斬瞻及尚書張遵等軍進至成都蜀主劉禪面縛昇觀詣軍請降

晉譙縱據蜀劉裕與朱齡石密謀取蜀曰劉敬宣往年出黃虎無功而退賊謂我今應從外水往而料我當出其不意猶從內水來也必重兵守涪城以備內道若向黃虎正墮其計今以大衆自外水取成都疑兵出內水此制敵之奇也而慮此聲先馳賊審虛實別有函封付齡石題曰至白帝乃開諸軍雖進未知處分至白帝發書曰衆軍悉從外水取成都臧熹朱

林從中水取廣漢使羸弱乘高艦十餘由內水向黃
虎譙縱果備內水使其大將譙道福戍涪城遣其將
侯暉譙詵等屯彭模夾水爲城以拒晉軍諸將以賊
水北城險衆多咸欲先攻其南城齡石曰不然雖寇
北今屠南城不足以破北若盡銳以攻北壘南城
不麾而自散也遂攻北城詰朝戰至日暮焚其樓櫓
四向並登斬侯暉譙詵仍引軍迴趨南城卽時潰散
朱林至廣漢復破譙道福別軍

後唐李嗣源襲鄆高行周爲前軍會夜分大雨人無
進志行周曰此天贊我彼必無備直出其不意是夜
涉河入東城比明平之

唐蘇定方驍悍多力爲折衝隨李靖襲突厥頡利於
磧口定方率二百騎爲前鋒乘霧而行去賊一里忽
然霧歇見牙帳遂掩襲之頡利狼狽散走

貞觀中蘇定方率兵討突厥賀魯大雪平地二尺軍
中咸請停兵候晴定方曰虜恃雪深謂我不能前進
必當憩息追可及若緩以縱之則漸遠難追省日兼
功在此舉也於是勒兵凌雪晝夜兼進所經收其人
衆遂至雙河去賀魯所居二百餘里布陣長驅徑至
金牙山賀魯牙帳所時賀魯集衆欲獵定方與兵擊

之破其牙帳生擒數萬人賀魯脫走拔石國定方於是悉命諸部歸其所居復其產業賀魯所虜掠者悉檢責還之於是西域諸國安堵如故令副將蕭嗣業往石國以追賀魯遂擒歸于京師

周末荆人伐陳吳救之軍行三十里夜不見星左史倚相謂大將子期曰雨十日夜甲輯兵聚吳人必至不如備之乃爲陣吳人至見荆有備而返左史曰其返覆六十里其君子休小人爲食我行三十里擊之必克從之遂破吳軍

東魏初高歡破爾朱兆兆奔秀容分兵守險出入抄掠歡每揚聲云欲討兆將出復止如此者數四歡揣兆歲首必應會飲使將竇泰率精騎先驅一朝一夜行三百里兆軍人因宴休惰忽見泰軍莫不奪氣因而克之

李愬攻蔡州吳房軍吏曰今日往亡請避之愬曰賊以往亡謂吾不來正可擊也又戰遂捷而歸

宋武帝謀討劉毅王鎮惡曰公若事西楚請給百舸爲前驅及西討轉鎮惡參軍事使率龍驤將軍蒯恩領百舸前發鎮惡受命便晝夜兼行揚聲劉兗州上先是毅稱病表請從弟兗州刺史藩爲副毅謂爲信

不知見襲鎮惡去江陵城二十里舍船步上蒯恩軍
在前鎮惡次之舸留一甲士看守對舸岸上立旗安
鼓語所留人曰計我將至城便長嚴令後有大軍狀
又分隊在後令燒江津艦船鎮惡徑前襲城津戍百
姓皆言劉藩實上晏然不疑將至城逢毅要將朱顯
之馳前問藩所在軍人答云在後及至軍後不見藩
又望江津船艦被燒旌旗甚盛知非藩上便馳馬告
毅令閉城門鎮惡亦馳進得入城便因風放火燒大
城南門及東門而襲破之

隋韋雲起討契丹以其與突厥相通素無猜忌雲起
既入其界使突厥詐云向柳城郡欲共高麗交易勿
言營中有隋使敢漏泄者斬契丹不備去賊營百里
詐引南渡夜復退還去營五十里結陣而宿契丹弗
之知也既明俱發馳騎襲之盡獲其男女四萬口女
子及畜產以半賜突厥餘將入朝男子皆殺之煬帝
大喜集百官曰雲起用突厥而平契丹

唐李元平大言好論兵宰相關播奇重之薦於上以
爲將相之器時李希烈反朝廷以汝州與賊接境刺
史韋光裔懦弱以元平代之既至部募工徒猶理郭
郭希烈乃使勇士應募執役版築凡入數百人元平

不之覺希烈遣將以數百騎突至其城先應募執役者應於內縛元平馳去既見希烈遺下汗地希烈見之曰盲宰相使汝當我何待我大薄耶

梁末侯景反陷建業高州刺史李遷仕據大臯圖逆召高京太守馮寶寶欲往其妻洗氏止之曰刺史無故不合召太守此詐君欲爲反耳頃者京師危迫羽檄召兵遍於郡縣刺史稱疾不赴繕甲訓兵今已備矣而更召者往必見留願且勿行遣使譎之曰身疾篤謹遣妻傳意并送土物以省之彼聞喜必無所防爲君取之如反掌耳寶從之於是洗氏自將千人皆

藏短兵步擔雜物唱言琛貨先書報遷仕曰太守馮寶疾篤謹令妻洗氏傳啓并奉土貢以資軍費遷仕大悅迎洗氏因釋擔出刃大破之遷士脫身而遁洗氏入據其城盡收其衆

唐馮行襲武當人僖宗在蜀有賊首孫喜者聚徒數千人欲入武當刺史呂燁惶駭無營行襲伏勇士於江南乘小舟迎喜謂喜曰郡人今得良牧衆心歸矣但緣兵多民懼虜掠若駐軍江北領肘腋以赴之使某前導以慰安士民可立定也喜然之既渡江軍吏迎謁伏甲奮起行襲擊喜仆地拔劍斬之其黨盡殪

賊衆在江北者悉奔潰

王全斌伐蜀自利州趨劍門次益光全斌會諸將議曰劍門天險古稱一夫荷戈萬夫莫前諸君宜各陳進取之策侍衛軍頭向韜曰降卒牟進言益光江東越大山數重有狹徑名來蘇蜀人於江西置砦對岸有渡自此出劍關南二十里至清強店與大路合可於此進兵卽劍門不足恃也全斌等卽欲卷甲赴之康延澤曰來蘇細徑不須主帥親往且蜀人屢敗併兵退守劍門莫若諸帥協力進攻命一偏將趨來蘇若達清強北擊劍關與大軍夾攻破之必矣全斌納

其策命史延德分兵趨來蘇造浮梁於江上蜀人見梁成棄砦而遁蜀帥王昭遠聞延德兵趨來蘇至清強卽引兵退陣於漢源坡留其偏將守劍門全斌等擊破之昭遠遁去遣輕騎追獲傳送闕下遂克劍州殺蜀軍萬餘人

未成列

齊高歡伐西魏至許原西宇文泰拒之至渭南召其兵皆未至諸將以衆寡不敵請待歡更西以觀之泰曰高歡越山度河遠來至此天亡之時也若至咸陽人情轉騷擾今及其新至便可擊之卽造浮橋於渭

令軍人齋三日糧輕騎渡渭輜重自渭南夾渭而軍
李弼謂秦曰彼衆我寡不可平地置陣此東十里有
渭曲可先據以待之遂進至渭背水爲陣李弼爲左
拒趙貴爲右拒命將士皆偃戈於葭蘆中日脯齊師
至望見軍少競萃於左軍亂不成列秦乃鳴鼓士皆
奮起合戰李弼率鐵騎橫擊之絕其軍爲二遂大敗
之

春秋時晉中行穆子敗無終及羣狄于太原崇卒也
將戰魏舒曰彼徒我車所遇又隘以什共車必克困
諸阨又克請皆卒自我始乃毀車以爲行五乘爲三

伍荀吳之嬖人不肯卽卒斬以狗爲五陣以相離兩
於前伍於後專爲右角參爲左角偏爲前拒以誘之
翟人笑之未陳而薄之大敗之

後魏侯莫陳崇從賀拔岳力戰破万侯醜奴與輕騎
逐北至州長坑及之賊未成列崇單騎入賊中於馬
上生擒醜奴遂大破之

新集

後漢末曹操征張魯定漢中劉曄進說曰明公以步
卒五千誅董卓北破袁紹南征劉表九州百郡十并
其八威振天下勢傾内外今舉漢中蜀人覩風破膽

失守推此而前蜀可傳檄定也劉備人傑也有智度
而遲新得蜀人猶未附今破漢中蜀人震恐其勢自
傾以公之神明因其傾而壓之無不克也若小緩之
諸葛亮明於理國而為相關羽張飛勇冠三軍而為
將蜀人既定據險守要則不可犯也今不取必為後
憂曹操不從居數日蜀降者說蜀中 日數十驚備
斬之而不能禁也操悔之又問曄曰今尚可擊否曄
曰今已小定未可擊也

隋漢王諒作亂遣其將綦母良自滏口徇黎陽塞白
馬津余公理自大行下河內朝廷以史祥為行軍總
管討之於河陰久不得濟祥謂軍吏曰余公理輕而
無謀又新得志謂其衆足恃恃衆必驕且河北人先
不習兵所謂擁市人而戰不足圖也乃令軍中修攻
具公理使諜知之果屯兵於河陽內城以備祥於是
艤船南岸公理聚甲當之祥乃簡精銳於下流潛渡
公理拒之未成列祥縱擊大破之

唐垂拱初突厥犯邊命黑齒常之率兵拒之躡至兩
井忽逢賊三千餘衆常之見賊徒輩下馬著甲遂領
二百餘騎身當先鋒直衝之賊遂棄甲而散俄頃賊
衆大至及日將暮常之令伐木營中然火如烽燧時

東南忽有大風起賊疑有救兵相應狼狽夜遁
宋太宗征太原時節度使何繼筠把石嶺關北虜來
援繼筠率數千騎禦之虜至乘其未成列遽麾兵擊
之虜衆大潰追奔數十里

未集

太祖親征澤潞車駕次滎陽西京留守向拱朝于行
在上召拱與語拱曰李筠逆節久露兵勢漸成陛下
宜速濟大河歷太行乘其未集而擊之平之必矣或
稽浹旬恐賊鋒益銳難爲力矣筠在澤州王師薄其
城下拔之

遠來

吳孫權拒曹操於赤壁諸葛亮說權云曹操之衆遠
來聞追劉豫州一日一夜行三百里此所謂強弩之
末不能穿魯縞也兵法忌之曰必蹶上將從之遂敗
操

晉劉琨守太原遣將姬澹率衆十餘萬討石勒勒將
拒之或諫曰澹兵馬精盛其鋒不可當宜深溝高壘
以挫其銳攻守之勢必獲萬全勒曰澹大衆遠來體
疲力竭犬羊烏合號令不齊可一戰擒之何彊之有
寇已垂至胡可捨去大軍一動豈易中還若澹乘我

之退顧走乃無暇焉得深溝高壘乎此為不戰而自滅之道也立斬諫者以孔萇為前鋒都督令三軍後出者斬設疑兵於山上分為二伏勒輕騎與澹戰偽收衆而北澹縱兵追之勒前後伏發夾擊澹軍大敗梁將陳慶之伐後魏之渦陽魏遣將元暉等率兵來援前軍至駝澗去渦陽四十里慶之欲逆戰諸將以賊之前鋒必是輕銳與我戰若捷不足為功如其不利沮我軍陣勢兵法所謂以逸待勞不如勿擊慶之曰魏人遠來皆已疲倦去我既遠必不見疑及其未集須挫其氣出其不意必無敗理且關虜虜據管林

木甚盛必不夜出諸將若皆疑惑慶之請獨取之於是與麾下五百騎奔擊破其前軍魏人震恐

後周末隋文帝作相遣將崔仲文先以兵定關東破尉遲迥將檀讓初仲文在蓼隄諸將皆曰軍士遠來士馬瘦敝不可決勝仲文令三軍趣食列陣大戰既而破城諸將皆請曰前兵疲不可交戰竟而克勝其計安在仲文笑曰吾所部將皆山東人果於進不宜持久乘勢擊之所以制勝諸將皆以為非所及也

魏孝武帝將圖高歡勒兵南出以高敖曹為前鋒稍逼京師魏帝親總六軍屯河橋宇文泰謂左右曰

高歡數日行八九百里曉兵者所忌正須乘便擊之而主上以萬乘之重不能渡河決戰方緣津據守且長河萬里扞禦爲難若一處得渡大事去矣果如其言帝西奔長安

十六國北凉沮渠蒙遜率兵伐南凉秃髮傉檀至顯美徙數千戶而還傉檀追及蒙遜將擊之諸將皆曰賊已安營不可犯也蒙遜曰傉檀謂吾遠來疲敝必輕而無備及其壘壁未成一鼓而滅進擊敗之乘勝至于姑臧夷夏降者萬數千戶傉檀懼講和和而歸梁將陳慶之大後魏之渦陽魏遣將元昭等率兵來

援前軍至馳澗去渦陽四十里慶之謂諸將曰魏人遠來皆已疲倦去我旣遠必不見疑及其未集須挫其氣出其不意必無敗理且聞虜所據營林木甚盛必不夜出諸君若皆疑惑慶之請獨取之於是與麾下五百騎奔擊破其前軍魏人震恐

東魏大將高欽伐西魏軍至許原西宇文泰至渭南沼諸州兵皆來會乃召諸將謂之曰高歡越山渡河遠來至此天亡之時也及其新至便可擊之卽造浮橋於渭令軍人齎三日糧輕騎渡渭南夾而軍至沙苑距歡軍六十餘里歡聞泰至引軍來會見泰軍沙

競馳而進不爲行列泰鳴鼓士皆奮起其將李弼等率鐵騎橫擊之絕其軍爲二遂大敗之斬六千餘級降者二萬餘人歡夜遁奔鎧仗十有八

唐鐵勒薛延陀等合衆二十萬度漠屯白道川太宗遣李勣等率兵數道擊之戒之曰延陀負其兵力踰漠而來經途數千里馬已疲瘦夫用兵之道先利速進不利速退吾已勅李思摩燒薙荻草延陀糧肉日盡野無所獲因時奮擊其衆潰散

唐正觀中大軍討高麗令江夏王道宗與李靖爲前鋒濟遼水克蓋牟城逢賊兵大至軍中僉欲深溝保險待太宗至徐進道宗曰不可賊赴急遠來大兵實疲頓恃衆輕我一戰必摧昔者耿弇不以賊遺君父我旣職在前軍當須清道以俟車駕李靖然之乃與壯士數千騎直衝賊陣左右出入靖合擊大破之

安祿山反郭子儀李光弼率師下井陘拔常山賊將史思明以數萬人踵其後我行亦行我止亦止子儀選驍騎五百挑之三日至行唐賊疲乃退我軍乘之又敗于沙河祿山聞思明敗益以精兵我軍至恒陽賊亦隨至子儀堅壁自固賊來則守賊去則追獲晝揚其兵夜襲其幕賊人不及息數日光弼曰賊怠矣

可以戰戰于嘉山斬馘四百級

饑渴

蜀諸葛亮出祁山魏將張郃督諸軍拒亮將馬謖於街亭謖阻依南山不下據城郃絕其汲道大破之隋初突厥寇蘭州大將賀樓子幹率衆拒之至河洛山與賊相遇賊衆甚盛子幹阻川爲營賊軍不得水數日人馬饑敝縱擊大破之

唐太宗圍王世充於東都竇建德率衆來救太宗頓兵武牢登高丘觀之謂諸將曰賊未見大敵今渡險而囂是軍無政逼城而陣有輕我心我按兵不出待

彼氣衰陣久卒饑必將自退追而擊之何往不克建德列陣自辰至午兵士饑倦太宗曰可擊矣乃帥輕騎先進大軍繼之所向披靡生擒建德

後梁遣王景仁將兵七萬人擊趙至栢鄉趙告急于晉晉王存勗遣周德威先屯趙州而自將會之梁兵馬鎧胄光彩炫熠晉人望之奪氣晉王欲速戰德威請待其衰乃進軍鄆邑久之德威將精騎三十壓梁壘門詬之景仁怒悉軍以出橫亘六七里汴宋之軍居西魏滑之軍居東晉王謂德威曰我爲公先公可繼進德威曰觀梁兵之勢可以勞逸制之未易以力

較也彼輕出而遠來與吾轉戰雖挾糗糧亦不暇食日跌之後饑渴內迫矢刃交外士卒勞倦必有退志當是時我以精騎乘之必大捷於今未可也王乃止至日晡梁軍未食士無鬪志景仁等引兵稍却德威鼓譟而進麾其西偏曰魏滑軍走矣又麾其東偏曰梁軍走矣晉兵爭進梁兵且相驚怖遂大敗自郃追至栢鄉橫尸數十里

糧盡

漢王與項籍約中分天下漢欲西歸張良陳平說曰漢有天下大半而諸侯皆附楚兵疲食盡此天亡之

時也宜因其饑而遂取之今釋不取所謂養虎自遺患也從之會諸侯兵于垓下終滅羽

後漢初河南賊董憲劉紆悉其兵數萬人屯昌慮招誘五校餘賊與之拒守建陽光武親征之去憲百里諸將請進帝不聽曰五校乏食當退敕各堅壁以待其敝頃之五校果引去帝乃親臨四面攻三日大破之

漢末青州黃巾衆百萬入兖州界刺史劉岱欲擊之鮑信諫曰今賊衆百萬百姓皆震恐士卒無鬪志不可擊也觀賊衆羣輩相隨軍無輜重惟以抄掠爲資

今不若蓄士衆之力先爲固守使彼欲戰不得攻又不能其勢必離散然後選精銳據要害擊之可破也岱不從遂與戰果爲所殺

唐武德初劉武周據太原其將宋金剛屯於河東太宗往征之謂諸將曰金剛持軍千里深入吾地精兵驍將皆在於此武周自據太原專倚金剛爲扞蔽金剛雖衆內實空虛虜掠爲資意在速戰我堅壁畜銳以挫其鋒分兵汾濕衝其心腹彼糧盡計窮自當遁去必待此機未宜速戰於是遣劉弘等絕其糧道其衆遂餒金剛乃遁

竇建德以兵十萬來援王世充于酸棗太宗將拒之諸將進諫曰腹背受敵恐非萬全請班師且據穀州以觀勝負太宗不許曰世充糧盡內外忿嫉當不勞攻擊坐收其敝耳建德新破孟海公將驕卒惰今我進據武牢扼其襟要若賊恃勝冒險爭鋒吾當破之必矣賊若不戰旬月之間世充自潰終如其言

穆宗用裴度伐王廷湊時諸道兵十五萬旣深入輦運艱阻芻薪不繼諸軍分番樵採度支轉運車六百乘盡爲廷湊邀而虜之兵食益困遂休兵

春秋時齊師宋師次于郎公子偃曰宋師不整可敗

也宋敗齊師必還請擊之公弗許自雩門竊出蒙臯比而先犯之公從之大敗宋師于乘丘齊師乃還

不整

晉伐楚晉大夫卻至曰楚有六間其二卿相惡王卒以舊鄭陳而不整蠻軍而不陣陣不違晦在陣而囂合而加囂各顧其後莫有鬪心舊不必良以犯天忌必克之敗于鄢陵

春秋時魯莊公與齊師戰于長勺公將鼓之曹劌曰未可齊人三鼓劌曰可矣齊師敗績公將馳之劌曰未可下視其轍登軾而望之曰可矣遂逐齊師既克

公問其故曰大國難測也懼有伏焉吾視其轍亂望其旗靡故逐之

不戒

春秋時衛人以燕師伐鄭祭足原繁洩駕以二軍軍其前使曼伯與子元潛軍軍其後燕人畏鄭二軍而不虞制人六月鄭二公子以制人敗燕師于北制君子曰不備不虞不可以師

吳侵楚養由基奔命子庚以師繼之養叔曰吳乘我喪謂我不能師也必易我而不戒子爲三覆以待我我請誘之子庚從之戰于庸浦大敗吳師

不整

後漢末曹操征烏桓登白狼山卒與虜遇左右皆慎
操登高望虜陣不整乃以張遼爲先鋒縱兵擊之虜
衆大潰

十六國涼沮渠蒙遜率兵伐南涼禿髮傉檀至顯美
徒數千戶而還傉檀追及蒙遜于窮泉蒙遜將擊之
諸將皆曰賊已安營不可犯也蒙遜曰傉檀謂吾遠
來疲敝必輕而無備及其壘壁未成可一鼓而滅進
擊之果敗乘勝至于姑臧夷夏降者萬數傉檀俱請
和而歸

離部

唐太宗征高麗築土山逼其城山頂數丈下臨城中
使果毅傅伏愛領隊兵於山頂以防敵會伏愛私離
所部高麗出城而戰據有土山攻之不能克遂班師

移陣

魏諸葛誕據壽春反魏將王基討之吳遣朱異來救
誕軍于安城詔王基引諸將據北山基謂諸將曰今
圍壘轉固兵馬向集但當精修守備以待越逸而更
移兵守險使得放縱雖有智者不能善後矣遂守便
宜上疏曰今與賊交利對敵當不動如山若遷移依

險人心搖蕩於勢大損諸軍並據深溝高壘衆心皆定不可傾動此御兵之要也書奏報聽壽春竟拔

心怖

晉侯圍曹門焉多死曹人尸諸城上晉侯惡之聽輿人之誦曰稱舍於墓師遷焉曹人克懼爲其所得者棺而出之因其克也攻之遂入曹

朱齡石伐蜀賊譙縱將譙道福重兵守涪侯暉等屯彭模齡石師次彭模夾岸連城立柵齡石謂禪將劉鍾曰天方暑熱賊今固險攻之難拔祇困我師吾欲蓄銳息兵伺隙而進卿以爲何如鍾曰不然前揚

聲言大衆由內江故譙道福不敢捨涪今重軍逼之出其不意侯暉之徒已破膽矣只可因其恐懼而攻之勢當必克克彭模之後自可鼓行而前成都必不能守若緩兵相持彼知虛實涪軍復來難爲敵也進不能戰退無所資二萬餘人適爲蜀子虜耳從之翌日進攻皆克斬侯暉等縱之城守相次瓦解

曹操與袁紹相持於官渡紹將淳于瓊等護輜重在烏巢操欲自往襲留曹洪守營乃選精銳步騎皆用袁軍旗職銜枚縛馬口夜從間道出人抱束薪所歷道有問者語之曰袁公恐曹操鈔掠後軍遣兵以益

備聞者信以爲然皆自若旣至圍屯大放火營中驚
亂大破之盡燔其糧穀寶貨殺士卒千餘人皆取鼻
牛馬割脣舌以示紹軍將士皆惶懼紹初聞操之擊
瓊謂長子譚曰就破攻瓊等吾攻拔其營彼固無所
歸矣乃使張郃高覽攻曹洪郃等聞瓊破遂來降紹
衆大潰

唐正觀中突厥雖叛將圖進取以李靖爲代州道總
管靖率驍騎三千自馬邑出其不意直趨惡陽嶺逼
之突利可汗不虞於靖見官軍奄至大懼相謂曰唐
兵若不傾國而來靖豈敢孤軍而至一日數驚靖知

之令間謀離其腹心進擊破之部落並走磧地

半濟

春秋時宋公及楚人戰于泓宋人旣成列楚人未旣
濟司馬曰彼衆我寡及其未濟也請擊之公曰不可
旣濟而未成列又以告公曰未可旣陳而後擊之宋
師敗績公傷股門官殲焉

吳伐楚楚師敗及清發將擊之夫槩王曰困獸猶鬪
况人乎若知不免而致死必敗我若使先濟者知免
後者慕之蔑有鬪矣半濟而後可擊也從之又敗楚
人爲食吳人及之奔食而從之敗諸雍澁五戰及

項羽引兵東擊彭越令大司馬曹咎謹守成臯卽漢王欲挑戰慎勿與戰漢果數挑戰楚軍不出乃使人辱之咎怒渡兵汜水半渡漢擊之大破楚軍

魏鍾繇都督關中匈奴單于作亂平陽繇帥諸軍圍之未拔而袁尚所置河東太守郭援到河東兵衆甚盛諸將議欲釋之去繇曰袁氏方強援之來關中陰與之通所以未悉叛者顧吾威名故耳若棄而去示之以弱所在之民誰非寇讐縱吾欲歸其得至乎此爲未戰先自敗也援剛愎好勝必易吾軍若渡汾爲營及其未濟擊之可大克也援果輕渡汾衆止之不

從濟水未半繇迎擊大破之

隋煬帝征高麗平壤將軍宇文述與九軍過鴨綠水又東濟薩水去高麗平壤城三十里因山爲營高麗國相莫支文德僞降請述還師奉其王高元朝行在所述見士卒疲敝不可復戰又平壤險固卒難致力遂因其詐而還半濟賊擊後軍於是大潰不可禁止將士犇還一日一夜至鴨綠水行四百五十里初渡遼九軍三十萬五千人還至遼東城惟二千七百人矣

唐武德初羅藝爲幽州總管竇建德率衆十萬來寇藝將逆戰薛萬均曰衆寡不敵今若出戰百戰百敗

當以計取之可令羸師弱馬阻水背城爲陣而誘之
賊若渡水交兵請公率精騎百人伏於城側待其半
渡而擊之必敗矣從之建德引兵渡水萬均邀擊大
破之

渡

董搏霄時朱臯固始賊復猖獗軍少不足以分討有
大山民砦及芍陂屯田軍搏霄皆獎勞而約束之遂
得障蔽朱臯我軍屯朱家寺賊至追殺之乃遣進士
程明仲往諭賊中招往者千二百家因悉知其虛實
夜縛浮橋於淝水旣渡賊始覺賊衆數萬據礪南我

軍渡者輒爲其所敗搏霄乃麾騎士別渡淺灘襲賊
後賊回東南向與騎士迎敵搏霄忽躍馬渡礪揚言
於衆曰賊已敗諸軍皆渡一鼓而擊之大敗亟追殺
之相藉以死者二十五里遂復安豐

地利

秦伐韓趙王令趙奢救之秦人聞之悉甲而至軍士
許歷請以軍事諫曰秦人不意趙師至此其來氣盛
將軍必厚集其陣以待之不然必敗奢曰請受令歷
又曰今先據北山上者勝後至者敗奢許諾卽發萬
人趨之秦兵後至爭山不得上奢縱兵擊之大敗秦

軍

漢韓信擊趙趙王聚兵井陘口稱二十萬李左車說
王曰韓信乘勝去國遠鬪其鋒不可當臣聞千里餽
糧士有饑色樵蘇後爨師不宿飽今井陘之道車不
得方軌騎不得成列行數百里其勢糧食必在後願
假臣奇兵三萬人從間路絕其輜重足下深溝高壘
勿與戰彼前不得鬪退不得還吾奇兵絕其後野無
所掠鹵不至日兩將之頭可致戲下趙王不從信使
間人伺知之大喜乃敢引兵遂下未至井陘三十里
止舍夜半傳發選輕騎二千人各持一赤幟從間道

單山而望趙軍戒曰趙見我走必空壁逐我汝疾入
壁拔趙幟立漢幟信又謂諸軍吏曰趙已先據便地
壁且彼未見大將旗鼓未肯擊前行恐吾阻險而還
先使萬人先行出背水陣趙兵望見大笑平日信建
大將旗鼓鼓行出井陘口趙開壁擊之大戰良久信
棄旗鼓走水上軍趙空壁逐信信已入水上軍軍皆
殊死戰信所出奇兵二千見趙空壁逐利卽馳入趙
壁立漢赤幟趙軍已不能得信欲還歸壁壁皆漢幟
遂亂遁走虜趙王

晉王存勗與梁軍戰于胡柳陂中有土山梁軍先據

之王曰今日之戰得土山者勝賊已據山吾與汝等
率軍先登遂奪其山諸軍繼集梁軍大敗時元城令
吳瓊等率各部役徒萬人於中山曳柴揚塵鼓譟助
其勢梁軍不之測自相騰藉棄甲如山積

天時

唐武德中突厥入原州太宗率兵拒之值雨連月太
宗召諸將謂之曰虜控弦鳴鏑弓馬是憑今雨連時
弧矢俱敝突厥人衆如鳥殺羽我屋宿火食槍槊犀
利料我之逸揣敵之勞此而不乘夫復何待今先以
勁兵亂其陣突騎躡其後虜進不相遜退不相救縱

不盡擒必獲十八九此曉兵者所解因潛師夜出冒
雨而進醜徒驚駭請和而去

張公謹副李靖經略突厥因言突厥可取之狀曰頡
利縱欲肆情窮兇極暴塞地霜早餼糧乏絕若師出
塞垣自然有應者太宗深納之果破定襄敗頡利
五代梁將劉鄩趨黃澤關路歸後唐莊宗遣兵追之
時霖雨積旬鄩倍道兼行皆腹疾足腫顛墜巖坂陷
于泥濘死者十二三

後唐契丹寇望都莊宗追擊之氊裘毳幕不可勝紀
時大雪平地五尺虜乏芻糧人馬斃踣于道纍纍不

